



NÓTA

ó: Ardrúnaíocht na Comhairle

chuig: na toscaireachtaí

Uimh. an doic. 14167/14

roime seo:

Ábhar: Conclúidí ón gComhairle maidir leis an Afganastáin

Ag an gcrúinniú a bhí aici an 20 Deireadh Fómhair 2014, ghlac an Chomhairle na Conclúidí ón gComhairle a leagtar amach san Iarscríbhinn a ghabhann leis an nóta seo.

**Conclúidí ón gComhairle
maidir leis an Afganastáin**

1. Is díol sásaimh don Chomhairle gur bunaíodh Rialtas na hAontachta Náisiúnta. Léirigh na toghcháin uachtaránachta agus na toghcháin tuaithe gurb é toil mhuintir na hAfganastáine go mbeadh an daonlathas i réim. Ba cheart do na toghcháin a bheidh ann amach anseo bheith inchreidte agus trédhearcach. Tá sé ríthábhachtach go nglacfadh údaráis na hAfganastáine gach céim is gá chun na heasnaimh atá ann a réiteach, ag tosú leis na toghcháin uachtaránachta an bhliain seo chugainn. Tá an tAontas Eorpach faoi réir le cabhrú leo an méid sin a bhaint amach.
2. Athdhearbhaíonn an tAontas Eorpach go bhfuil sé tiomanta don Afganastáin ar bhonn fadtéarmach agus athdheimhníonn sé an straitéis chuimsitheach ar tháinig an Chomhairle ar chomhaontú ina leith i mí an Mheithimh. Tá sé beartaithe aige oibriú i ndlúthchomhar leis an rialtas nua agus leis na comhpháirtithe idirnáisiúnta chun an dul chun cinn a rinne muintir na hAfganastáine le trí bliana déag anuas a chosaint agus chun tacú leis na hathchóirithe atá ag teastáil go géar agus chun dreasachtaí a chur ar fáil ina leith. Tuigeann an tAontas go mbeidh ról ríthábhachtach ag Misean Cúnaimh na Náisiún Aontaithe san Afganastáin (UNAMA) amach anseo.
3. Is díol sásaimh don Chomhairle gur cuireadh bailchríoch ar an gClár Ibhliantúil Táscach don Afganastáin, ina leagtar amach gealltanais an Aontais suas le €1.4 bhiliún cúnaimh a chur ar fáil don tréimhse idir seo agus 2020. Is comhlánú é an maoiniú seo ar an gcúnamh forbraíochta a chuir na Ballstáit ar fáil ar bhonn déthaobhach. Dearbhaíonn an tAontas an athuair go bhfuil sé lánsásta bailchríoch a chur ar an gComhaontú Comhair maidir le Comhpháirtíocht agus Forbairt. Beidh an méid sin mar bhunús do chomhpháirtíocht fhadréimseach, fhadtéarmach idir an tAontas agus an Afganastáin. Cuireann an tAontas in iúl arís eile go bhfuil rún daingean aige síneadh a chur le misean póilíneachta an Aontais san Afganastáin (EUPOL) go dtí deireadh na bliana 2016.

4. Is díol sásaimh don Chomhairle gur síníodh an Comhaontú Déthaobhach Slándála le Stáit Aontaithe Mheiriceá agus gur síníodh freisin an Comhaontú maidir le Stádas na bhFórsaí le ECAT. Beidh na comhaontuithe sin mar bhunús do láithreacht leanúnach mhíleata idirnáisiúnta a thacóidh le Fórsaí Slándála Náisiúnta na hAfganastáine ar mhaithe leis an tslándáil san Afganastáin. Ní mór do Rialtas na hAfganastáine ceannasaíocht a léiriú má táthar chun an tsíocháin agus an tslándáil a chothú go fadtéarmach agus ní mór don rialtas caidreamh cuiditheach comhsheasmhach a chur ar bun le tíortha comharsanachta. Is díol sásaimh don Aontas go dtionólfar an chomhdháil aireachta "Croí na hÁise" i mBéising an 31 Deireadh Fómhair. D'fhéadfadh an chomhdháil aireachta ról nach beag a bheith aici maidir leis an ollstruchtúr réigiúnach eacnamaíoch agus slándála is gá a chur ar bun. Iarrann an Chomhairle ar thíortha uile na hÁise Láir an t-aighneas atá eatarthu a chur ar leataobh agus an deis a thapú chun cobhsaíocht agus rathúnas a chur chun cinn ar bhonn fadtéarmach san Afganastáin agus sa réigiún máguaird.
5. Iarrann an Chomhairle go dtabharfaí gealltanas cinnte daingean maidir le cearta an duine, agus go háirithe go gcuirfí chun feidhme go hiomlán na reachtanna atá ann cheana maidir le cearta na mban agus na gcailíní. Dearbhaíonn an tAontas an athuir go seasann sé go tréan agus ar bhonn prionsabal i gcoinne phionós an bháis i ngach uile chás, faoi gach uile chúinse.
6. Tá sé ríthábhachtach anois go n-achtóidh Rialtas na hAfganastáine na hathchóirithe is gá ionas go gcuirfear muinín an athuir sa gheilleagar, ionas go gcruthófar poist agus ionas go méadófar ioncam an Stáit. Ní mór dul i mbun gnímh freisin chun an córas breithiúnach a athchóiriú, chun dul i ngleic leis an éilliú agus le fadhb na ndrugaí agus ionas gur mó an fhreagracht a bheidh ar an stát ós comhair ghnáthmhuintir na hAfganastáine, lena n-áirítear comhlachtaí díláraithe cinnteoireachta a bhunú ar an leibhéal tuaithe agus dúiche. Le comhdháil Londan an 24-25 Samhain, beidh deis ag an rialtas a chuid gealltanas a leagan amach i ndáil le hathchóirithe sna réimsí sin agus beidh deis ag an bpobal idirnáisiúnta a chuid gealltanas fadtéarmach a léiriú arís maidir le tacú leis an Afganastáin.